


春秋不傳

卷一之卷三





嘉慶己卯鐫

春秋不傳

循陔堂藏板

維揚大東門外文奎齋川



序

天之行地也高遠不可測也星辰之次舍有度可以測天也星辰何者非天然天非星辰所能究也河之出崑崙也廣大不可測也湖陂溝澮之流有自可以測河也湖陂溝澮何者非河然河非湖陂溝澮所能窮也善觀天者蒼蒼之上仰首而天體自如也善察河者至龍門積石而河勢自可睹也然則舍星辰而後可以知天舍湖陂溝澮而後可以知河而況星辰者復有時而為彗蒺湖陂溝澮者復有時而為填闕淳汙孰是以定天與河豈不難哉聖人之春秋其高遠天也其廣大河也然學者終日戴天而不見天終日臨河而不見河非盲者何以至是左氏博矣不務求聖人之

指而求詳於瑣細繁稱雜說豈有當乎公穀簡直矣不務求聖人之指而憑胸臆意見其失也愈遠矣其尤戾於經者豈不亦星辰之彗第湖陂溝澮之填闕渟汙乎哉善乎歐陽永叔一言斷之也曰經不待傳而通者十七八因傳而惑者十五六以此言之則傳爲案經爲斷雖程子之言猶有所未盡而況其他乎吾嘗欲取三傳之合於經者節裁爲一書而盡芟其繁雜臆見大戾於經者惜乎有志而未之逮也湯子迪宗著春秋不傳其言曰使左氏傳不出則春秋將遂不行乎哉何識之卓也湯子手其書示余且問序余讀之不斤斤乎株守三傳而善采其長不硜硜乎立異三傳而不襲其短而其自得之處直欲求聖人之心於千載之下湯子之

用心於經蓋可謂勞而有功矣乎夫魚未得而舍筌醪未得而合糟粕不能也執筌求魚而謂糟粕之卽醪焉可乎三傳者經之筌與糟粕也吾見世之學者類以筌爲魚而餽糟粕以爲醪也湯子其殆有得於魚與醪者乎而何筌與糟粕之足恃乎哉曰春秋之作也使子夏十四人求周史記得百二十國寶書而旣作卽口授子夏子夏傳之公羊高穀梁赤者也則皆有得於傳聞矣棄三傳而自信豈遂有當乎余曰三子者固非親承指授者也左氏之非邱明昔人言之矣其言語浮誇近於邱明所恥之巧言而公穀未嘗見聖夫游於聖門者尙不盡識春秋也經書不告朔猶朝於廟而子貢欲去告朔之羊經書納衛世子蒯瞶於戚而子路以正名

爲迂臣輒而死之况傳聞者乎吾與湯子亦相與仰觀於天俯察於河而已矣

康熙丁未律中黃鐘之月陽生日白田布衣王巖撰

序

寶應湯先生啟祚字迪宗逾冠棄諸生業隱居城南之槐樓村博學通經史康熙四十九年庚寅七月卒年七十六所著春秋不傳十二卷同里王巖已序之矣曾孫秋林復屬予題其後予惟春秋一經自漢以下左邱公羊穀梁三傳迭爲盛衰然未有廢傳而說經者也至唐之中葉而啖助趙匡陸淳始自以己意窺測聖經而置三傳於不講雖宋子京新唐書傳贊深斥其非然在昌黎韓子之贈盧仝也亦曰春秋三傳束高閣獨抱遺經究終始然則廢傳言經固中唐人風會爾爾蓋儒術之興廢其乘除倚伏有如此至宋而廢傳者愈多廬陵歐陽子伊川程子其尤著也胡安國傳最

後出而科舉格式獨遵用之三傳幾於不行前明三百年間場屋舉子但知有胡傳而已矣

本朝彙纂始復兼取三傳並左氏外傳及諸家之說今先生之爲是編也不任傳亦不廢傳其意蓋以經文之微言大義學者自可尋繹而得之所患三傳之說先入而爲之主則學者之心思爲其所束縛聖人之本旨爲其所蔽錮害莫甚焉故藩屏撤斯堂奧觀矣泥沙滌斯清源來矣若三傳之美者固未嘗不取而融浹於其中特如蜂之釀蜜蜜成而不見有花故名其書爲不傳云爾然則自有先生此編彼世之拘守三傳者固當一旋其面目卽師心自用妄謂得聖人心法者亦將無所藉口矣先生此書豈胡安國之

可比哉遂僭附其膚言如此

乾隆辛卯六月旣望進士及第通議大夫光祿卿前史官西莊王

鳴盛撰

春秋不傳序

丙午夏湯子迪宗持所著春秋不傳命余爲之序先是一歲余讀其書深歎其用意之精欲以直洽乎宣尼之志而無所附麗也既歸之矣湯子復有請亦可以知其積慮之虛與世之挾所學以爲矜凌必將贅疣皇甫者何啻千里也夫傳必無乎經存而傳亦存經未嘗不以傳爲羽翼何可置也傳必有乎則是傳亡而經亦亡傳且將以經爲影響也殊不爾矣聖經譬若日月日月行乎十二舍不聞日月必假十二舍而後明經之於傳其亦猶是且孔子之作春秋不能逆揣其書之成必有繼其後以立之傳者故畱此闕略晦昧之文以待之則先斷後案亦後人成事之詞聖人不若是

春秋不傳 序
拙亦不若是巧也漢世以來箋疏雜出往往有所依傍而浸失作者之意學春秋者因左氏繁多之文使述傳者勝於述經事實增而義類減豈所謂脫略傳註獨抱遺經者哉今讀湯子之書不假左傳一詞而經之或抑或縱或子或奪或進或退瞭然若指諸掌其文則天矯出沒峭削刻露探諸子之長而融其迹天高地下穆然太虛萬物返真白賁無色謂之直洽乎宣尼之志余無佞焉雖然必有其學而後可以無傳必有其學而後可以有傳即謂湯子並為左氏功臣亦可也湯子其首肯余言乎
康熙丙午夏五月拙存張璠書于疎豁堂

春秋不傳

目次

卷一

隱公

十有一年

己未之己巳

卷二

桓公

十有八年

庚午之丁亥

卷三

莊公

三十有二年

戊子之己未

卷四

閔公 二年

庚申之辛酉

卷五

僖公 三十有三年

壬戌之甲午

卷六

文公 十有八年

乙未之壬子

卷七

宣公 十有八年

癸丑之庚午

卷八

成公 十有八年

辛未之戊子

卷九

襄公 三十有一年

己丑之己未

卷十

昭公 三十有二年

庚申之辛卯

卷十一

定公 十有五年

壬辰之丙午

卷十二

哀公 十有四年

丁未之庚申

春秋不傳卷一

寶應湯啟祚著

春秋之翼以左氏傳而行舊矣雖伊川子亦曰傳為案經為斷然愚心竊疑之疑俾左氏傳不出則春秋將遂不行乎哉陽明子曰傳為案經為斷恐伊川亦屬相沿世儒之言然則春秋殆不翼左氏傳而行者也述春秋不傳 啟祚自識

隱公

名息姑惠公之長庶子也按說法不顯尸國曰隱

己未

周平王四十九年

元年

齊僖公祿父九年 衛桓公完十三年 蔡宣公考父

鮮十一年 晉鄂侯郟二年 曲沃莊伯

二十八年 鄭莊公寤生二十二年 曹桓公終生三十五年 陳桓公鮑二十三年 杞武公二十九年 宋穆公和七年

秦文公四十四年 楚武王熊通十九年

春秋不傳

卷一 隱公

春王正月

非春也而曰春從周也正月歲之始也歲之始必曰王公羊子曰大一統也無事也何以舉正月元年也元年則何以舉正月正始也正始則宜書即位不書不正其即位也蓋隱公之即位不正也何曰非春周春正月中冬也

三月公及邾儀父盟于蔑

稱公奉上之辭也邾附庸也字其君附庸乎中國也志盟惡之也自公及之我欲也強人也于蔑盟未有不地者也月盟盟猶可信也盟者自古然矣夫何以惡之也必有不能相信而後信以言言末也故凡盟惡也

夏五月鄭伯克段于鄆

克之爲說猶勝也段者君之寵弟而先君之愛公子也何故克之嫌逼也夫克之必用師其以目君也何歸之以獄也以逼嫌而克之獨奈何爲獄之歸若段一妄人耳他日者不思有以訓之而惟斃之之術之是極焉其視段何如也于鄆遠也子若曰段已在于鄆矣然猶非鄭伯意也不言日不以克之之日克也克之非一日矣段不言子與弟穀梁子曰段失子弟之道也且賤段乃以甚鄭伯烏知其子弟目君也若非子與弟則不

秋七月天王使宰咺來歸惠公仲子之賵

宰不名者也宰名刺天王之不能正以妾爲妻之罪而顧寵之

春秋不傳 卷一
也仲子者惠公之妾也係以惠公寵自惠公也日來不宜來也
日使不宜使之來也然則王何以猶稱天書王之始不可以不
言天也王失也而嫁其幸于宰可乎相君者將邪是務閉而惡
是長焉無乃不可乎書王之始何不可不言天當時有僭稱王
者稱天示不可僭也受而不返日歸喪助有日贈

九月及宋人盟于宿

諱公諱以我之欲強與微者盟也國爲地君與也月猶信也借
日以微者及焉然不言使謂非諱公乎

冬十有二月祭伯來

祭伯者天子之卿也胡爲乎來哉朝也不言朝奪之也天子之

卿義不得私朝乎諸侯也奪其朝則無名胡爲乎來哉胡爲乎
來哉月來謹也

公子益師卒

貴戚之卿也乃不言卿程氏曰不與其以公子之故而自爲卿
也書公子貴戚之也卒志貴戚之也且死生人之大故也凡卿
之卒不葬卑之葬不與聞以尊也不日親也而有疎之者也

庚申周平王五十二年

春公會戎于潛

以公會之彼欲也強于人也時會略之也如不欲書也潛會地
也

夏五月莒人入向

入國豈無師稱人微之也微之者惡之也入不順之辭也不謹以日猶或非無謂也然至于入則甚矣入者造其國都也

無駭帥師入極

未賜族之大夫也帥師專兵也大夫專兵危公也不言官大夫之義不得專兵也是公使之不言使諱紊王章也入不順也極未聞有罪

秋八月庚辰公及戎盟于唐

時會日盟詳之也詳之者謹之也會之非矣奈之何且至于欲與之盟而遂盟也不諱公盟戎之始也故大也又自我意也

九月紀履緌來逆女

履緌紀大夫也來逆女求婦也求婦使大夫是小婚禮也

冬十月伯姬歸于紀

嫁曰歸不返也稱伯姬女嫁則字而笄之也魯女嫁于諸侯衆矣此何以書譏何譏乎譏不恥大夫之來逆而反成其苟合也不曰女伯姬視來逆之時則已嫁矣

紀子伯莒子盟于密

盟志惡也外盟不志此則來告也紀侯而曰子無國而曰伯殆必有關文也子曰吾猶及史之闕文也

十有二月乙卯夫人子氏薨

夫人以日薨敵體乎君而得正以斃也葬不志從君者義不得先君以成禮也若葬夫人則豈不亦豫凶乎君哉

鄭人伐衛

伐天子之事也鄭伯專之故人之罪鄭也衛亦未可勿問也聲罪致討曰伐不戰服也

辛酉 平王五十三年 宋穆九年

春王二月己巳日有食之

言日不言朔食既朔也其日有何也見日之蝕也而不見其食之者故曰有也夫日食有常度矣然而必書于君之象也

三月庚戌天王崩

周來赴也禮周人有喪魯人不弔非謂不弔也謂當親之然而平王崩魯侯不往也葬不志竟不往也君子謂公于是乎不臣也崩者上墜之形

夏四月辛卯尹氏卒

天子之卿也天子之卿卒不志志譏也何譏乎世卿也故不言名而言氏也世卿衆矣奈何獨譏乎尹卿尹氏之世卿不善也秋武氏子來求賻

胡爲也哉平王之崩故也平王崩魯不賻而周來求焉書來不宜來也求者抑辭君子臣不言求也乃言求是譏天王之不能討不共其職之罪而顧卑其尊如卑乎卑焉不君甚矣故如不

欲書而書以時也武氏子云者譏世卿且愈譏使世卿之未命者也顧不言使王當喪猶未君賻因喪而助生之物也致周來求魯罪可勝言哉

八月庚辰宋公和卒

諸侯以日卒正也外諸侯不薨嫌于內在國不地略于內

冬十有二月齊侯鄭伯盟于石門

來告也來告必書惡之也

癸未葬宋穆公

諸侯五月而葬禮也諸侯之葬當時不日日公羊子曰危不得葬也何危乎宋穆公宣其兄也殤其姪也莊其子也有不忍聞

焉然非所得已也

于周桓王四年衛桓十六弑宋殤公與夷元年

春王二月莒人伐杞取牟婁

時伐也伐以月謹其取也致伐者或有罪也奈何悉虜而俘之詎不亦以亂易亂也者不言師豈無師微之也

戊申衛州吁弑其君完

州吁以國氏有寵之者也不言其官弑君之賊人所得而誅不與齒也不曰衛君曰其君引而親而尊之也諸侯之日卒正也此不正而亦日焉非日卒也日以謹其弑也自下賊上曰弑

夏公及宋公遇于清

遇無意之會也則宜曰暨曰及是有意也有意而托若無意焉則其意可知矣凡外之遇不及此則內故也于清謂無事而輕遠出也書時厭詳也

宋公陳侯蔡人衛人伐鄭

衛人逆賊也諸侯所宜致伐者而顧與爲亂焉且爲之首事是不亦與亂賊已乎奈何不同人之曰正以歸獄于公與侯也夫非儼然公侯也者何以獨人蔡蓋蔡之罪差薄于宋陳焉耳且以示蔡人則宋陳同焉或曰微者將也

秋翬帥師會宋公陳侯蔡人衛人伐鄭

翬去公子謹微也大夫會伐不由公命矣君子謂翬于是乎有

弑逆之萌而助亂以樹黨也然不謹以月子其有懼思與再序四國重惡也

九月衛人殺州吁于濮

稱人以殺討賊之辭也言人所得殺也州吁之君衛已歷三時所夫殺之善矣而君子猶惜其緩也故言于濮言逸也

冬十有二月衛人立晉

立者不宜立也以人立之可以立也自九月而殺賊迨彌時而立焉立豈未審者子民何勿宜也可以子民胡勿可以君國曰未有王命又非先君之樹子也故晉去其公子

癸亥周桓王五年晉鄂六奔衛

宣公晉元年

隱公

七

春公觀魚于棠

左作矢

左氏曰非禮也且言遠地也故如不欲書也常事曰視非常曰觀

夏四月葬衛桓公

弑君不葬也弑君而葬賊已討也桓公之弑已踰小祥而葬于夏四月何也蓋自立晉以來五月矣賊既討若立于始卒也者可也且喪猶未闋

秋衛師入郕

入國不月從同同也然稱師則臨以大衆可知矣雖不月可也九月考仲子之宮初獻六羽

仲子之宮則非先君之宮也不敢以祔而天王則賵之爰是宮之雖嫡庶之意猶存而端斯兆矣考成也成必祭初獻六羽譏也非譏乎六譏乎初六維初八也不亦多乎備武曰侑萬文曰羽謂夫婦道無需于也

邾人鄭人伐宋

人伐而月甚伐也邾小國先于鄭兵之主

螟

記災也譏夫致災者也凡月甚也災而月未甚也

冬十有二月辛巳公子彊卒

日卒公子親夫貴戚之卿正也而亦賢也

春秋不傳 卷一
宋人伐鄭圍長葛

報怨之師雖不人不月可也人而月謹圍也圍環而攻之之謂

甲桓王六年 晉哀侯光元年
子周三年 曲沃莊十六卒

春鄭人來輸平

平善也何書來輸是書以抑之圍于宋而後平于我也故略也

夫輸者納也蓋必有受者君子謂賄于是乎彰

夏五月辛酉公會齊侯盟于艾

地盟謹也會盟困也日盟渝也

秋七月

無事過時則書首月備時也四備而後歲功成焉苟一之弗備

夫何成哉

冬宋人取長葛

志取惡取也取不係于伐意不專罪取者也蓋凡取也不言圍先圍而後取罪不救者也夫鄭以宋故而平我而我不以平故而救之故離長葛于鄭明示哉我有同戚矣然不日不月則以我故有隱辭焉

乙桓王七年 晉曲沃武公稱元
丑周四年 秦文五十卒

春王三月叔姬歸于紀

一逆而二歸媵也媵則其書也何賢也何賢乎叔姬有後事也乃其歸也曷不與伯姬也偕待年也待年而後歸則歸之者非

也

滕侯卒

不名未同盟也未同盟而志赴也不日赴略也外不敬也不葬未往會也赴而不會內不敬也

夏城中邱

城者葺舊也舊則葺焉必也雖不書可乎書妨民也蓋夏者民時也是固宜謹以月其不月甚之也既妨民而更彌時焉嘻其甚矣

齊侯使其弟年來聘

諸侯相聘禮使乎大夫也其弟云者謂其寵之蓋其大夫也以

弟而大夫其使也以弟而大夫而使然則齊侯之弟其弟知有弟耳已庸弟弟之道矣

秋公伐邾

伐而親之公甚也邾我好也已則渝蔑之盟而復加之辭故甚公也

冬天王使凡伯來聘

禮也然而魯侯不朝也朝缺而聘不廢不亦替乎

戎伐凡伯于楚邱以歸

一人而伐伐者重也伐天子之命使是伐天子矣地以楚邱失翼衛也衛侯其弟賓王人矣以歸易也凡伯其弟畏簡書矣雖

然春秋之大事日也不猶月也戎伐凡伯于楚邱以歸大孰甚焉雖然戎伐凡伯于楚邱以歸則危亦孰甚焉

丙桓王八年 蔡宣三十五年 寅周五年 秦寧公元年

春宋公衛侯遇于垂

外書遇禮簡也外之遇不及以爵及之也

三月鄭伯使宛來歸祓

歸書不宜歸也來書不宜來歸也使書不宜使之來歸也何用知之以其目君而謹以月知之祓者何鄭先祖之受于先王者何用歸之于我蓋以為賂而輸之鄭伯于是不臣矣是棄先王之命矣且又棄先祖之所守也又于是焉不予矣

庚寅我入祓

日入惡入也入內不受也我入彼不受也祓非我有也斯與于不臣而不予者也

夏六月己亥蔡侯考父卒

辛亥宿男卒

會同盟而不名史失也

秋七月庚午宋公齊侯衛侯盟于瓦屋

外盟不日此其日謹參盟之始也惟盟之淪于是為參盟蓋其防淪至矣即其淪斯至矣

八月葬蔡宣公

不及時而不日公羊子曰慢葬也

九月辛卯公及莒人盟于浮來

公及人盟替也又自我意也不諱公先此矣

螟

冬十有二月無駭卒

未賜族也未賜族則猶非世官近古也

丁桓王六年 蔡桓侯封

春天王使南季來聘

再聘愈替矣季南氏字也字之王朝之大夫也

三月癸酉大雨震電庚辰大雨雪

記災也雪止而後震電出焉天之時也況建寅之月震電固未
可以出乎而況其大乎況震電既出雪遂不可以復雨乎而況
其大乎

挾卒

夏城郎

屢妨民厲甚矣

秋七月

冬公會齊侯于防

戊桓王七年 壬辰

春王二月公會齊侯鄭伯于中邱

數會重惡也矧其會之為謀伐人而且動于欲也

夏翬帥師會齊人鄭人伐宋

大夫伐而專會不由公命矣夫安知非公使之曰其敗之也目公則是與乎師也公與而翬專之非不由命而何翬不氏以不由公命之屢謂其弑逆成矣

六月壬戌公敗宋師于菅辛未取郟辛巳取防

敗詭道而勝之也春秋之書兵也曰孰師敗敗者為主曰敗孰師則敗之者為主以公主之罪公也孟子曰善戰者服上刑曰春秋之法戰未有不日者也謹也郟與防宋邑也取我取之也罪取也取不日者也日取頻取也此惡也曷為不諱胡氏謂取

有甚于此取者也其敗之也曷為不言戰非兩戰也

秋宋人衛人入鄭

宋人蔡人衛人伐戴鄭伯伐取之

目鄭伯甚鄭伯也何甚乎罪善戰也一國而伐取四國之師非力之所及矣固必以術先戰乎四國待其敝而後已徐以逸獲焉然則入鄭之師實鄭伯術致之而伐戴之師亦鄭伯術悞之耳

冬十月壬午齊人鄭人入郕

日入甚入也

己酉桓王十有一年

春滕侯薛侯來朝

累數滕薛旅見也諸侯相朝禮也相朝而旅見非禮也旅見諸侯天子之事也

夏公會鄭伯于時來

秋七月壬午公及齊侯鄭伯入許

先會而後入成謀也會者鄭爲志入而書及則又我爲政也旣爲鄭志奈何復以公主之謂公之成乎入許也

冬十有一月壬辰公薨

弑也何以知其弑不地也弑則何以不地有不忍地也何以不書弑臣子之于君父有諱道焉臣子爲君父諱然矣不幾逸賊

已乎日彰之矣弑君者誰桓公也何以知其桓公繼弑君不言卽位言是與乎弑也躬弑君者誰翬也何以知其翬我之執政未或不卒者也翬不卒賊也故隱之世皆去其公子也君薨矣何以不名內也何以不葬賊未討也賊未討則何以不葬先君之仇未復則臣子之職未盡也葬生者之事也穀梁子曰隱十年無正隱不正也元年有正正隱也

春秋不傳卷一終

五世姪孫 顓校棐

春秋字音

隱公

元年

父音甫後皆同

蔑莫結反

鄆音偃

咺吁阮反

賄撫鳳反

祭

側界反後皆同

二年

向舒亮反

帥朔律反後皆同

綸音須

三年

賻音附

四年

翬許歸反

濮音卜

五年

邲音成

螟音冥

驅苦侯反

六年

艾五蓋反

八年

祊必彭反

九年 雨 于付反

十年 敗 必邁反後言

營 古頑反

郟 古報反

十有一年 朝 音潮後言來朝皆同朝公公朝亦同

春秋不傳卷二

寶應湯啟祚著

桓公 名軌史記名允惠公之少子而隱公之弟也

庚周 桓王 元年 齊僖二十 晉哀七 衛宣八 蔡桓四 鄭莊

十 宋殤九 秦 寧五 楚武三十

春王正月公即位

桓無王此何以有王元年也元年則何以有王討之於即位之始也繼故不言即位言者何君子謂其有即位之心也則誅之

三月公會鄭伯于垂

以鄭志罪鄭伯也動于欲而定其位與亂賊是與于亂賊者也

鄭伯以璧假許田

假不曰以曰以是易之也易則稱假也何蓋易無歸之道焉而假猶有歸之道焉夫子惡其久假而不歸也許田者吾先祖之受于先王者何為許鄭假之桓公之篡于位也不列于會則不可得而定也而鄭伯之溺于利也不飫其欲則不可得而會也故知以璧者其文也璧雖寶豈貴于土地哉然則以者不以者也我失地矣奈何獨以目鄭伯殆所謂窺關不責以穿窬也

夏四月丁未公及鄭伯盟于越

會既鄭志盟何以公及之推之于其隱矣然則鄭將無譏乎夫首盟亂賊又何譏乎

秋大水

記災也時災災彌時甚災也

冬十月

辛未 周桓王二年 宋殤十弒

春王正月戊申宋督弒其君與夷及其大夫孔父

桓無王此何以復有王討宋督也督以國民寵也不自氏惡也及其大夫孔父賢也日及不失其節矣日大夫不失其官矣賢則何以名劉氏日名其君于上則不得字其臣于下也

滕子來朝

滕故侯也其日子時王黜之也書來朝何以無貶首朝亂賊奚

容貶矣胡氏以爲夫子黜之者悞也夫子固未嘗黜諸侯也況
聖人不念舊惡卽一人之身且然奈何以祖父之愆而累及其
孫子乎謂四夷雖大皆曰子固也夫四夷之大者莫若吳與楚
然實則周室之子也謂時王不能黜之則杞薛無說矣其曰使
時王能黜諸侯春秋豈復作乎似矣不知此正春秋之所由作
也問是非勿問強弱王法也加諸弱弗加諸強豈王法哉
三月公會齊侯陳侯鄭伯于稷以成宋亂

會不言以會而以極之也何極之惡極也成者成之也成宋亂
則宋亂于是成矣內之大惡諱也乃此之不諱何公旣彰賂之
弗惜卽欲諱庸可得乎庸直爲遠也已乎然以者我爲志而以

齊陳鄭志之者則猶有諱焉何成乎宋亂立督後也

夏四月取郟大鼎于宋戊申納于大廟

鼎係之郟郟大鼎也郟大鼎係之宋宋郟大鼎也取于宋賂也
書取不宜取也納內不受也納于大廟周公其吐之矣日納謹
納也

秋七月杞侯來朝

蔡侯鄭伯會于鄧

外會不志志重之也何以重之爲楚也何以知其爲楚卒卽楚
者蔡與鄭也而鄧又鄰楚之小國也相爲會故知其爲楚國爲
地君與也然則何以不月日月之矣朝不月者而月會月也

九月入杞

孰入之我也不言我諱也甫朝而遽入也甚也故諱之也

公及戎盟于唐

冬公至自唐

至自云者致之也何以致危之也危其淪胥于戎也隱盟戎矣何以不致隱無戎之道也桓有戎之道也

壬周桓王十三年 晉哀九獲 宋申周一年 莊公馮元年

春正月公會齊侯于贏

何以無王桓無王也桓何以無王桓弑君則不知有王是無王也無王何以始于三年諸侯之喪闕矣當入見之時也而天子

不加刑焉則王亦不王矣

夏齊侯衛侯胥命于蒲

胥之為說猶相也相命則不盟矣所惡乎盟者為其不能相信也苟能相信而不盟其又何惡焉

六月公會杞侯于郕

秋七月壬辰朔日有食之既

言日言朔食正朔也既盡也日食變矣食而既變甚也

公子翬如齊逆女

弑君之賊不復見此其復見何歸獄于桓公也夫逆女者常事也何以書夫以位埒地醜而壤接之齊魯而廢親迎之禮焉則

其故不綦大矣蓋婚姻萬世之始也輩何以反稱公子罪桓以其弑君之故而尊寵之也故知凡輩之弑爲桓弑也逆者我之夫人何以不稱夫人逆于外未成乎夫人也然則何以稱王后王者無外侯者有外

九月齊侯送姜氏于謹

親送女非禮也而況越境也稱姜氏父母之辭不字猶未歸手我則字不可得而知也謹別也

公會齊侯于謹

齊侯來奚可以不會然不親迎也鄰豈重于婚耶

夫人姜氏至自齊

不以輩致見公矣未入國而遽見公苟合也不能正諸始又安能閑諸卒哉

冬齊侯使其弟年來聘

再謂其弟終寵之也

有年

記異也五穀皆熟曰有年何以爲異桓宜無年者也不然熟亦常事耳豈二百四十二年之間而僅桓宣兩見哉然則天道僭乎曰否十有八年而一熟則其歉也多矣

癸酉周桓王十四年晉小子侯元年

春正月公狩于郎

狩時也何以書非狩所也非狩所則何以書厲民也

夏天王使宰渠伯糾來聘

宰不名者也宰名刺天王之不能討弑君之罪而顧寵之也兼爵已封也貴之也何以無秋冬二時王者象天而出治者也故春夏者陽也生也秋冬者陰也殺也生者賞也殺者刑也桓公弑君而天討不加又從而聘之非有賞而無刑乎則非有春夏而無秋冬乎夫四時備而後歲功成焉無秋冬成何歲矣則無刑將成何治矣

甲戌周桓王十五年陳桓三十八卒

春正月甲戌己丑陳侯鮑卒

陳侯卒以二日疑也疑也者宜闕也或曰再赴也

夏齊侯鄭伯如紀

外相如朝也外朝不書此何以書大不朝乎小也大而朝乎小且旅而朝焉則其心不可問矣

天王使仍叔之子來聘

比年而聘乃無譏從同同也仍叔之子云者猶武氏子也然不日仍氏而日仍叔猶非世官

葬陳桓公

葬不月慢甚也是有賊也者何以葬非先君之賊也

城祝邱

春秋不傳 卷二
秋蔡人衛人陳人從王伐鄭

從王正也正則何以稱人人衆辭也正從王之辭也王何以不稱天伐而目王親之矣夫伐不使乎司馬是危道也故知非天討也不戰存君臣也

大雩

雩旱祭也書記災也書大雩譏僭也雩諸侯得舉焉大雩則非諸侯得舉焉魯之大雩多矣不可勝譏爰擇其尤者時慢也

螽

時螽甚災也

冬州公如曹

外如不書此何以書不復也何以知其不復有後事也州非公其曰公會三公乎天子也

乙丑 桓王十六年 陳厲公 周四年 陳厲公 躍元年

春正月寔來

寔者誰州公也何以名失國也諸侯不生名失國則名謂其有失國之道焉可以名也謂其去死也幾希矣何以來失國而依赖于我也不係之州來自曹不來自州

夏四月公會紀侯于郕

秋八月壬午大閱

非閱月也且大閱則僭矣日者崇武故謹之簡車徒曰閱

蔡人殺陳佗

以人殺之討賊之辭也佗者誰陳君也何以知其陳君下相殺則不書也陳君獨何以人殺之陳賊也何以知其陳賊先君之終也日不可知而葬不成禮是豈無故者矣陳賊何以蔡殺之善蔡也天下之賊天下之人得討也天下豈有無君之國哉不日陳君佗其日陳佗是陳人不君之善陳也葬先君賊乎子也九月丁卯子同生

冬紀侯來朝

以世子之禮舉之也何以書志喜也正也可謂能端于始矣此世子也不云胡氏日天下無生而貴者誓于天子然後爲世子

丙子周桓王十七年晉小子四殺

春二月己亥焚咸邱

此所謂焚林而田也奈何其焚林而田也則不仁孰甚夫古猶有開網者伊誰乎日焚甚焚也

夏穀伯綏來朝鄧侯吾離來朝

列數穀鄧猶非旅見也諸侯不生名其名之何朝于亂賊謂其不復有臣子之心其去死也幾希矣然則滕杞紀何以不名近也近則何以不名懼于威非得已也此何以名遠也遠則何以名魯雖強豈能越數國而加威于己哉其何急而朝之也何以復無秋冬二時桓公弑君天子不能討然猶有望于方伯之師

也今諸侯自遠而朝焉則豈復有所望于方伯之師也

丁桓王十八年 晉侯緡元年 杞武四
丑周六年 十七卒 秦寧十二卒

春正月己卯烝

烝月也何以書有後事也

天王使家父來聘

無譏從同同然屢聘之又何譏矣

夏五月丁丑烝

再烝黷也且非烝月也

秋伐邾

冬十月雨雪

記異也不時也

祭公來遂逆王后于紀

祭公者三公也何為乎來哉天王使之命我以婚姻也不言使
不與其使也譏天王也夫婚姻萬世之始也諸侯親迎天子不
親迎雖使三公惡乎不可曰命我矣雖不使三公可也遂繼事
之辭也譏專也罪祭公也使之命我曾使之逆王后乎女猶在
于紀何以稱王后王者無外其辭成矣

戊桓王十九年 杞靖公元年
寅周七年 九年 秦出子元年

春紀季姜歸于京師

王后歸不悉書書我主之也逆則后矣歸何以復字之蓋逆自

逆者而言也尊也示天下之母儀也而歸自歸者而言也謙也
化天下以婦道也夫女子子之字不出乎外此何以知之也惟
我主之故與聞之京師天子之所也大曰京衆曰師

夏四月

秋七月

冬曹伯使其世子射姑來朝

朝不言使言使不正其使也世子豈無朝之禮也者奚以不正
其使曰世子國之本也輕出則搖而繼續又國之大事也覬覦
者衆今曹伯老矣未踰時而卒亦或且疾矣何急于朝魯而輕
出其本則其不搖也者幾希

己卯周桓王十年曹桓五年卒

春王正月庚申曹伯終生卒

桓無王此何以復有王十年也十年則何以復有王成數也成
數則成乎有王也何成乎有王桓雖無王然王豈嘗無焉

夏五月葬曹桓公

當時而不日公羊子曰正也

秋公會衛侯于桃邱弗遇

弗遇何以言會會有地期辭也弗者遷辭蓋衛遷于齊鄭矣春
秋有會而食其言者君子惡其不信也乃方期會而言食焉其
于信也何有

冬十有二月丙午齊侯衛侯鄭伯來戰于郎

來戰穀梁子曰前定之戰也內不言戰言戰敗也敗之者為王故惡諸侯也夫桓公弑君天王不討則有譏方伯不討則有譏此何以惡諸侯蓋或定其位矣或雖未遇于會而期為會矣或屢為會而妻以女矣則何得以為討乎

庚辰周桓王十有一年鄭莊四十三卒曹莊公射姑元年

春正月齊人衛人鄭人盟于惡曹

此皆諸侯也何以稱人貶曷為貶惡黨也何以知其諸侯來戰于郎乃盟于惡曹也且微盟不志何以知其黨既來戰矣復盟是黨也不日人諸侯又奚煩日矣

夏五月癸未鄭伯寤生卒

秋七月葬鄭莊公

九月宋人執鄭祭仲

何以人宋公蓋公也者公也乃執人之正卿而挾之以廢立庸復有公道乎奚以明其然也仲既執而突歸而忽出焉則宋公之為矣仲稱字命大夫也胡氏曰非賢之也乃尊王命貴正卿大祭仲之罪而深責之也使仲無廢立之權則宋人不執之矣執拘而維之之謂

突歸于鄭

突不稱公子絕之也不係之鄭義不得有鄭也日歸易辭也有

歸之者也

鄭忽出奔衛

忽者誰鄭君也不言君不能君也且未踰年亦未成乎君也係之鄭義得有鄭也義得有鄭則其名何失國也出者有外之辭夫奔必有逐之者其以目奔者何已無可逐之實則人孰得而奔我矣且不使以臣逐君即所以存君臣之防

柔會宋公陳侯蔡侯盟于折

柔不氏貶也以大夫而會盟諸侯也當尊也

公會宋公于夫鍾

臣盟而君復會不信也

冬十有二月公會宋公于闕

再會瀆也

辛周桓王二十有二年衛宣十九卒鄭厲公突元年陳厲七卒

春正月

夏六月壬寅公會杞侯莒子盟于曲池

秋七月丁亥公會宋公燕人盟于穀邱

數會而日盟渝也

八月壬辰陳侯躍卒

公會宋公于虛

冬十有一月公會宋公于龜

春秋不傳
卷二
既盟而又數會其瀆不亦甚乎

丙戌公會鄭伯盟于武父

日盟惡盟也孰惡乎惡公也安知其非淪及鄭伐宋是淪于宋而不淪于鄭也會者鄭志何惡于公夫宋既屢會矣又再盟矣而鄭又嘗來戰矣乃盟之而食吾言則罪將誰歸

丙戌衛侯晉卒

再稱日穀梁子曰決日義也

十有二月及鄭師伐宋丁未戰于宋

盟書會乃伐而書及者使公首惡也鄭有師我豈無師不言目公也然不言公則諱也曰伐宋宋固可伐矣戰于宋不綦甚乎

地以國是戰于城下也不綦逼乎戰于伐者伐為主戰既敗矣而猶以我主之甚戰也

王桓王二十一年
衛惠公朔元年
陳莊公林元年

春二月公會紀侯鄭伯己巳及齊侯宋公衛侯燕人戰齊師宋師

衛師燕師敗績

先會而後日戰之日會而後得也戰以君君將也君為將則敗何以更稱師重眾也先紀于鄭而會以公內兵之主也先齊于宋而後以衛燕外兵之主也戰不地于紀也何以知其于紀會先紀而及戰故知其于紀其曰敗績云者敗者為主曲齊也故知于紀之師非紀實致之而齊與諸侯實至之也則兵端開自

齊矣乃書會而及戰其以紀主是戰也何罪紀也春秋之紀兵也弗問勝負紀因魯鄭則所因非于所因矣衛宣猶在殯朔何以稱侯孤而即戎罪孰大焉奈何且吉服以從金革也

三月葬衛宣公

葬自內錄也及衛戰矣又嘗來戰矣何以葬衛宣公怨不棄義禮也故鄭莊齊僖皆葬也

夏大水

秋七月

冬十月

此亦無事過二時何以猶書曰四年曾譏天王矣七年曾譏方

伯矣于此書焉不亦可乎

癸未周桓王二十有四年齊僖三十三年秦出子六卒

春正月公會鄭伯于曹

無冰

記異也時燠也譏夫致異者也未終時也何以書加之寒之辭

夏五

傳疑也故史闕也故闕而不益蓋其慎也

鄭伯使其弟語來盟

來盟前定之盟也故稱使其弟云者鄭之語亦猶齊之年也不日前定矣不以盟之日定盟也

秋八月壬申御廩災

記災也御廩者何藏糝盛之所也夫災則必復作矣不書常事也常事何以不書義有不得不作者雖用民力庸何傷

乙亥嘗

譏不敬也穀梁子曰以為唯未易災之餘而嘗可也蓋嘗必有兼旬之事焉壬申御廩災乙亥嘗是以災餘嘗也且非嘗月也冬十有二月丁巳齊侯祿父卒

卒自外錄也及齊戰矣又嘗來戰矣何以卒齊侯祿父怨不棄義禮也故鄭寤生衛晉皆赴也

宋人以齊人蔡人衛人陳人伐鄭

穀梁子曰以者不以者也或小而以大或弱而以強或寡而以衆皆非力所及也殆必有以也以謂能左右之

甲周 桓王二十 十有五年 齊襄公諸兒元年 秦武公元年

春二月天王使冢父來求車

曰求非所宜求也乃王與使皆無譏則譏之于求矣皇皇天子而車服弗共其致求者何如也

二月乙未天王崩

夏四月己巳葬齊僖公

危不得葬也何危乎齊僖公襄其子也年其弟也有不忍聞焉五月鄭伯突出奔蔡

名失國也

鄭世子忽復歸于鄭

稱世子宜有國也係之鄭義得有鄭也歸順辭也安知其非易復歸以世子是正之矣書復喜復也鄭其所故有也正則其名也何名以正其世子也若曰世子者若也雖欲勿名得諸

許叔入于許

入內不受也穀梁子曰其歸之道非所以歸也字許叔諸侯之弟也諸侯之弟字而不言弟正也其有名者弟之則名蓋必挾其弟者而後弟之故惡之也何以書既入即君許矣

公會齊侯于艾

邾人牟人葛人來朝

何以人朝君也君何以稱人貶也何以貶胡氏曰天王崩不奔喪而相率朝弑君之賊也累數旅見也

秋九月鄭伯突入于櫟

出奔名也入國何以名絕之也不與其入國而猶爲失國之辭也此復有鄭矣其曰入于櫟何國之也入于櫟而鄭得矣故曰大都耦國非利也入逆辭也安知其非難入而名是不正之矣冬十有一月公會宋公衛侯陳侯于袤伐鄭

地而後伐疑辭也穀梁子曰非其疑也鄭者忽在焉伐忽是殆將納突也君子非其疑于輔正乃伐之而納不正也

乙酉周元莊王十有六年鄭厲五昭公忽元年

春正月公會宋公蔡侯衛侯于曹

夏四月公會宋公衛侯陳侯蔡侯伐鄭

衛不先蔡也衛而先蔡是紊王制也小蔡侯殆小天王矣

秋七月公至自伐鄭

伐而致甚伐也不正其伐鄭也夫安知其非危乎屢甚乎伐鄭矣故知其不正之也餘以事致者正也何以故非屢甚也

冬城向

城時也何以書久之也蓋彌時矣又急之也初冬猶非城時也十有一月衛侯朔出奔齊

丙戌周二年莊王十有七年衛惠五黔牟元年蔡

春正月丙辰公會齊侯紀侯盟于黃

二月丙午公會邾儀父盟于越

夏五月丙午及齊師戰于奚

我豈無師不言目公也何以目公渝黃之盟也

六月丁丑蔡侯封人卒

秋八月蔡季自陳歸于蔡

何以書賢也何賢乎蔡季有後事也歸順辭也自陳陳有奉焉耳何以不遂君蔡曰其斯以為賢與

癸巳葬蔡桓侯

不及時而日公羊子曰渴葬也蔡桓何以獨稱侯賢蔡季也何
 賢乎蔡季知請諡也何以知其知請諡公也侯也有定稱矣其
 類稱公者假之也私也若請于天子則不可得而假之也知請
 諡則何以賢蔡季君子之愛人也以德非所得而故奉之不如
 得其正之為能遺先君以安也故知春秋之侯伯子男葬未有
 不稱公者皆譏其臣子也葬生者之事也何以知其蔡季之知
 請諡日蔡季歸而桓侯葬故知其蔡季也

及宋人衛人伐邾

及而伐乃不言所及諱渝雉之盟也

冬十月朔日有食之

言朔不言日夜食也日出而即已有食象焉固非食于日也

丁酉

莊王三年

十有八年

蔡哀侯獻舞元年鄭厲七子亶元年殺

春王正月公會齊侯于濼

桓無王此何以復有王公終矣正之于其卒也又先王之喪畢
 矣新天子當討有罪之時也

公與夫人姜氏遂如齊

遂者繼事之辭然則濼之會姜氏殆與焉不言弗數也君子惡
 姜氏之專也與者許之也自公與之君子謂公之不夫也則其
 及也亦猶自取焉耳

夏四月丙子公薨于齊丁酉公之喪至自齊

弒也何以知其弒繼故不言卽位蓋莊公不卽位也弒君不地此其地何弒于齊則不可以不地也旣諱弒矣又地之不幾逸賊已乎曰彰之矣弒君者誰夫人也何以知其夫人偕公行者夫人也而喪歸而夫人孫則是與聞乎弒也齊之賊我君者誰齊侯也何以知其齊侯地以國則是目君也致喪重之也又隱之也

秋七月

冬十有二月己丑葬我君桓公

過時而日公羊子曰隱之也又內之葬未或不日者也弒君賊未討不葬也此其葬何穀梁子曰不責踰國而討于是也公羊

子曰讎在外也魯故侯也何以爲公躬見賊于齊何以爲桓私諡也臣子未知請于天王也然則生何以稱公胡氏曰生而稱公爲虛位沒而係諡爲定名

春秋不傳卷二終

五世姪孫 顓校栞

春秋字音

桓公

二年

與

平聲

大

音泰後言大廟皆同

三年

贏

音盈

謹

呼端反

四年

狩

舒救反

糾

音九

五年

仍

如陵反

雩

音于

螽

音終

六年

寔

丞職反

佗

音駝

七年

綏

息遺反

八年

雨

見隱九年

九年

射

音亦

十有一年 寤音誤 突陀骨反 夫音扶 闕口暫反

十有二年 虛去魚反 燕於言反後國名皆同

十有三年 敗如字後言敗績皆同

十有四年 語音禦

十有五年 櫟來的反又音藥 袞昌氏反

十有六年 向見隱二年

十有七年 趙翠軌反

十有八年 灤廬篤反又音洛

春秋不傳卷三

寶應湯啟祚著

莊公名同桓公之子也按諡法勝敵克亂曰莊

戊子周元莊王元年 齊襄五年 晉緡十二年 衛惠七黔牟三年 蔡哀二年 鄭厲八年 子儀元年 曹莊九年 陳莊七年 杞

靖十一 秦武五 宋莊十七 楚武四

春王正月

公何以不言即位繼故也繼故則何以不言即位先君不以其道終則有所不忍言也且已無天王之命矣又豈嘗有先君之命也無事何以舉正月元年也

三月夫人孫于齊

孫者何奔也不言奔爲內諱奔也夫奔必有逐者孫則未有逐者有子之辭也夫人何以去其姜氏與弒乎公絕不爲親也則何以猶稱夫人曰正以歸獄于夫人也若曰夫非夫人也者然夫人故于齊矣且又卽復于魯矣其曰孫于齊何則夫子之討賊也云耳

夏單伯逆王姬

單伯者誰我大夫也字之命大夫也何爲而逆王姬歸之于齊也是必逆于京師矣不言穀梁子曰其義不可受于京師也是必天王命我主之矣亦不言何也夫王者以孝治天下獨奈何使衰麻之人接仇讎之弁冕而與爲講婚媾乎王姬何以不字

以王重也且姬猶未至

秋築王姬之館于外

魯主王姬之嫁舊矣豈無舊館也者曷爲復築之曰于外也曷爲築之于外其亦知齊之不可以接婚姻也乎胡氏曰築之于外之爲宜不若辭而弗主之爲得也築者創始也

冬十月乙亥陳侯林卒

王使榮叔來錫桓公命

錫命舉諡追錫之也追錫非禮也王何以不稱天啖氏曰寵篡弒以瀆三綱也夫王者象天是無天焉耳榮叔書字王朝之大夫也宰猶名矣大夫何以不名蓋宰則與有責焉耳大夫則不

與有責焉耳故知春秋之譏天王是非所得已焉耳

王姬歸于齊

我主王姬舊矣此何以書歸于齊也齊我仇也王姬下嫁齊侯豈勿親迎者不書不使齊侯得與我為禮也王姬歸矣我又主之何以終不字歸于我之仇則字非我所宜聞也

齊師遷紀邾鄆部

國而曰遷此邑而遷何也邑遷而國舉矣係之紀明乎紀之亡係乎此邾鄆部之遷也歷遷其三邑而目已無全紀矣遷之以齊師甚齊也夫小國恃大國之安靖已而何以用大眾而擄而攘之可乎夫遷也者徙其朝市也

己周莊王二年 陳宣公杵臼元年 宋莊十八卒

春王二月葬陳莊公

夏公子慶父帥師伐於餘邱

國而曰伐此邑而伐何也危慶父之專兵也蓋慶父之得兵權從此矣翬去公子于隱慶父乃何以不去公子于莊累公也慶父之得兵權則莊公之為也

秋七月齊王姬卒

何以卒齊王姬譏服之也我為之主而我為之服惡乎不可曰忘不共戴天之仇矣惡乎可何以知其服之從內女比也冬十有二月夫人姜氏會齊侯于禚

夫人孫矣何時而復不志不與其復也義不可以復也禮婦人無外事見兄弟不踰闕父母沒則不歸寧夫死則從子以夫人會齊侯無一可者也君子謂其無羞惡也然則何以稱姜氏曰正之以姜氏則其贖于姓不其甚諸夫夫死從子也乃宜從而不之從則公亦不能子而已矣月會謹也

乙酉宋公馮卒

庚莊王三年 宋閔公 寅周六年 捷元年

春王正月溺會齊師伐衛

溺不氏疾之也曷為疾之會仇讎伐同姓也

夏四月葬宋莊公

五月葬桓王

天子七月而葬此七年矣其不能葬何如耶

秋紀季以鄫入于齊

季者誰紀侯之弟也字之無譏焉耳鄫者何紀邑也何以入于齊以之事齊也大夫不得以地以之以紀季其無譏也何居乎蓋有不得已焉耳齊已屢遷我邑矣不及其未遷而先以事之則必將無後其宗廟矣可奈何入者難辭也內不受也此齊之欲也奈何以內不受之辭言之罪齊也夫子以為齊雖欲而于義有不得受焉耳

冬公次于滑

何爲也哉將救紀也將救紀則何以次于滑有畏也不能救也故止于滑也次者止也何以知其將救紀齊我仇也紀我之婚姻也義有不得不救者也救而次則君子謂其無勇也然不言救紀若曰此次也何爲也哉

辛 莊王 四年 楚武王 十一年 卒

春王二月夫人姜氏享齊侯于祝邱

會之甚矣享之抑又甚矣且非享人也抑又非享地也

三月紀伯姬卒

何以卒內女也內女衆矣斯有後事也

夏齊侯陳侯鄭伯遇于垂

于時鄭有二伯此遇者誰乎突也安知其非子儀蓋突有四國之援焉而子儀無四國之援焉夫一國胡可以有二君則將孰與之胡氏曰莫適與也不沒其實耳

紀侯大去其國

國豈可去者哉去而曰大不復也國從此亡矣然則何以不名不得已也其不得已者何迫于齊也君子謂其猶未有失國之道焉可以不名也故大其去也然則何以不罪乎齊邾鄆郟既遷矣鄆既入矣則齊之罪其煩再著焉

六月乙丑齊侯葬紀伯姬

紀之喪齊何以葬之乎齊葬之而錄罪齊侯也何罪乎齊侯齊

侯之擯紀也雖有殯而弗能待其虐不其甚焉故目言之也雖然攘其國而葬其殯夫獨不可以晚蓋也者雖然肝人之肉矣而復含噍以哺之焉而曰吾仁也者夫誰欺日葬隱之也

秋七月

冬公及齊人狩于禚

月狩也何以時略之也略之者惡之也此齊侯也其曰人何公羊子曰諱與讎狩也與讎狩則無復有人子之心矣雖非狩時略之不亦宜乎然既諱與讎狩矣而猶書日及其以公志是狩也何重惡也

十莊王五年 楚文王熊
辰周八年 賁元年

春王正月

夏夫人姜氏如齊師

師者衆也以夫人而如齊師并不得如若會若享之猶可爲之名也君子謂其無復猶有羞惡之心也自是其行不月厭詳也

秋邠黎來朝

邠附庸也名其君附庸乎夷狄也夷狄之附庸則其書來朝何知能來朝也則亦朝之而已矣

冬公會齊人宋人陳人蔡人伐衛

此皆諸侯也其稱人何人公之敵所以人公也其人公也何逆王命也其逆王命也若何諸侯之伐衛也納朔也乃諸侯伐之

而王救之乃王既救之而諸侯猶固納之非逆王命而何況朔之出奔也名則既絕之矣雖無王命納猶不可齊歸我衛俘矣則是伐者猶我志也其曰會何諱也何以知其諸侯以公會也

癸巳 莊王六年

春王正月王人子突救衛

王人下士也子突字也字之大夫也下士何以得如大夫之字其救衛善也王善而諸侯惡可知矣則善王而惡諸侯從可知矣

夏六月衛侯朔入于衛

此諸侯納之也不言不使諸侯得抗王命也存君臣也故名朔

而絕之也入逆也

秋公至自伐衛

致伐久之也自冬而徂秋蓋經歲矣久之者惡之也夫衛伐而朔入乃朔既入而後伐致則其伐衛之為納朔也夫奚疑

螟

冬齊人來歸衛俘

俘係之衛衛俘也衛之俘則曷為以齊人來歸使齊侯首惡也乃齊人則曷為以之來歸猶我志也故知諸侯之伐衛納朔之為動于欲也夫宋郟大鼎猶惡矣而況重之以逆天王之命也俘者何寶玉也俘非寶玉也虜厥寶玉曰俘

春秋左傳卷三十一
甲周莊王七年
午十年

春夫人姜氏會齊侯于防

夏四月辛卯夜恒星不見夜中星隕如雨

記異也恒星者經星也不見者可以見也隕如雨云者其隕也如雨也隕如雨者星也不曰恒星不見者恒星而隕如雨者則不知其恒星不也既不見矣何以隕夫見而隕者雨惟不見而隕故曰如雨既日夜矣其又日夜中何也恒星不見殆終夜也星隕如雨則惟夜中

秋大水無麥苗

記災也水而曰大則無或不水也兼言麥苗兩無也時維麥既

成而苗伊始而值夫大水焉故兩無之也兩無麥苗則小民奚以為卒歲之計也豈不亦饑者乃不言饑渴饑也無子民之心其何以為民之父母也

冬夫人姜氏會齊侯于穀

一歲再會抑又甚矣而況踰境矣

乙未周莊王十八年齊襄十一年

春王正月師次于郎以俟陳人蔡人

何為也哉將圍邾也將圍邾則何以次于郎以俟陳蔡也而陳蔡人不至焉故止也何以知其將圍邾以俟陳蔡而陳蔡人不至焉乃及齊師以圍之也然不言圍邾若曰此之輕動夫大眾

而侯陳蔡也何爲也哉夫陳蔡人既不至矣何以書罪不信也

甲午治兵

曷爲治兵久役也役既久則必有失伍而亂次者能無亡潰之虞夫無故而欲有事于鄰國既有期而不至其亦可以自反也乃猶不悛而復重之以黷武也其若之何且夫兵而煩于治也則其不輯也何如

夏師及齊師圍郕郕降于齊師

齊我仇也郕我同姓也及而圍之獨奈何親仇讎以攻同姓也然而郕降于齊師矣親仇讎以攻同姓其亦能服之不耶夫郕

既降斯滅矣乃不言也何不與郕以得滅也滅亡國之善辭也降于云者降者爲主罪郕也謂其不能守也然降豈非君乃不以目君也何迫于兩大也

秋師還

久之也久之者惡之也然曰師還無名焉耳抑又無功焉耳冬十有一月癸未齊無知弒其君諸兒

丙申周二年九年莊王十九年齊桓公小白元年

春齊人殺無知

討賊也

公及齊大夫盟于藐

盟不月略之也略之者惡之也如不欲書也公何以及大夫盟
 齊無君也何以及齊大夫盟將納糾也不名大夫義不係諸大
 夫也夫納糾是欲置齊君也置人之君德孰大焉何以惡之也
 及者我志也而彼齊者我父之仇也所宜寢干枕戈以圖報之
 者也若之何欲置其君而以大德報之也然則何以不諱公若
 諱則無以見其忘親而釋怨也胡氏日以直報怨可也竊以為
 猶非也夫怨固有小大也此不共戴天者也然則奚若其怨若
 怨焉

夏公伐齊納糾齊小白入于齊

伐以納而親之甚公也納內不受也糾與小白皆去其公子俱

非先君之樹子也小白係之齊而糾不係之齊小白義猶得有
 齊而糾不得以有齊也入逆辭也既得以有齊矣則其以逆言
 之何其入之道非所以入也

秋七月丁酉葬齊襄公

葬弑君賊既討也過時而日公羊子曰隱之也乃衛完何以不
 隱齊小白猶能葬乎襄公而衛晉殆不能葬乎桓公也

八月庚申及齊師戰于乾時我師敗績

內諱敗也此其言也何喜復讎也喜復讎則其言敗也何大復
 讎也復讎為大則敗猶小矣故喜言之也我有師矣及戰不言
 目公也乃不言公也何不與公以復讎也公非能復讎者也

春秋左傳卷三
九月齊人取子糾殺之

殺復稱子義不得殺也子也者云先君之子也先君之子則我之鼻弟也禦侮急難之謂何而推刃同氣也取不義之辭也以人取之言易也病內也故不言其子使我同戚也

冬浚洙

洙者水也浚深之也書勞民也固國之道非所以固也

丁酉 莊王十年

春王正月公敗齊師于長勺

我敗猶喜之矣此敗齊矣獨奈何以公主之公非能復讎者也故長勺我地也而不言齊師之至者若我致之者然夫戰未或

不日也者何以不日蓋凡戰之日者夫戰則必有罹乎兵刃者蓋隱之也此則敗齊也則君子謂其可以復讎也又奚以隱為

二月公侵宋

侵而親之易凶事也易凶事危道也侵潛師以掠人之境也

三月宋人遷宿

遷云者遷之者為主其或有遷于云者則遷者為主主之者罪之也以宋遷宿滅之也遷不地竟滅也夫遷國豈無師其以人遷之何目君也目君則其稱人何罪遷也

夏六月齊師宋師次于郎公敗宋師于乘邱

齊宋之師何以止于我境伐我也不言伐我甚敗之者也謂其

春秋左傳卷三十一
若未有伐形也者況敗宋而逸齊則君子謂其失輕重也何以亦不日宋黨乎齊則亦我仇也大復讎也然則乾時之猶日內敗也然齊宋師言次則亦無名焉

秋九月荆敗蔡師于莘以蔡侯獻舞歸

荆者何州名也此荆者何國楚也楚則其州舉之何為僭王也蔡侯何以名絕之也曷為絕之荆得以之歸則既服為臣僕也此之不日乃危之也有不敢日也荆之強暴庸有既與

冬十月齊師滅譚譚子奔莒

滅國不日非一日之事也滅之以師迫以大衆也滅強辭也有不易滅者也故曰亡國之善辭也夫國滅而君奔不能死位矣

況國已亡矣曷不名以絕之猶未有滅道也且猶未服為臣虜也則猶有復道也其奔也不日出無內之辭也

戊周莊王十十有一年

春王正月

夏五月戊寅公敗宋師于鄆

秋宋大水

外災也何以書來告也來告必書謹天戒也且天下之民天下之君所宜子者也能無痾焉屢敗宋矣何以來告禮也

冬王姬歸于齊

何以書歸于齊也此王姬也其歸也辭曷為與諸侯之女同示

婦道也

己周莊王十有二年宋閔亥周五年崩十有二年十弒

春王三月紀叔姬歸于鄫

紀亡矣何以書紀叔姬以叔姬之賢而存紀也叔姬何以歸于鄫鄫之入于齊也為後宗廟也故叔姬有歸道也歸順辭也雖然使叔姬而來歸焉惡乎不可然叔姬不歸于宗國則叔姬之所以賢也君子謂其婦道為無虧矣何以迨于今乃歸紀侯始卒也則何以不卒紀亡國之君也

夏四月

秋八月甲午宋萬弒其君捷及其大夫仇牧

冬十月宋萬出奔陳

書出奔逸賊也先君之賊不能討而逸之則無復有臣子也于陳陳受之也然則天下殆有無君之國也

庚子周僖王十有三年杞靖二十三年卒宋桓公御說元年

春齊侯宋人陳人蔡人邾人會于北杏

齊侯何以與諸國之微者會也諸侯也諸侯則其稱人何無王也其無王也若何尊齊侯以主盟也蓋諸侯之主盟從此矣侯主盟是無復有王也乃齊何以顧稱侯使之得主盟也其使之得主盟何齊侯之主盟也非所以自為也乃以代王也夫王不逮而代之其或亦可乎哉

春秋不傳 卷三
夏六月齊人滅遂

滅國豈無師其以人滅之何目君也目君則其稱人何罪滅也
乃滅譚何以不目君以譚薄也譚子奔是猶無君焉耳若遂則
不聞有奔者是能死于位也是有君焉耳

秋七月

冬公會齊侯盟于柯

盟不月略之也略之者惡之也何以惡之始平于齊也胡氏以
爲易世不仇者固也然猶有仇道焉齊雖易世矣而我所讎乎
齊者猶由我父也猶由我父則言齊宜必有戚戚焉者不然乾
時之戰豈仍諸兒也乎雖然亦既已平之矣則亦勿復讎之矣

辛酉 僖王 十有四年 鄭子儀十四弑
丑周 二年 杞共公元年

春齊人陳人曹人伐宋

伐國稱人微者將也微者將則霸者之師也是則齊侯之爲也
何以知其非貶其辭平也何以伐宋宋背會也何以知其背會
乎諸國會于北杏而已獨致伐也故知之

夏單伯會伐宋

不再序乎三國平辭也無所惡也謂其可以伐也若翬之會伐
鄭則再序之矣

秋七月荆入蔡

冬單伯會齊侯宋公衛侯鄭伯于鄆

春秋左傳卷三
大夫當尊曷為不貶命大夫也

壬僖王三年十有五年

春齊侯宋公陳侯衛侯鄭伯會于鄆

再會汜霸也陳始服也

夏夫人姜氏如齊

歸寧也何以書父母沒也

秋宋人齊人邾人伐郟

宋何以先兵主也何以先于齊齊猶未成乎霸也

鄭人侵宋

侵宋而人鄭罪侵也曷為罪之背會也背會也者間霸也

冬十月

癸僖王四年十有六年
晉緡二十七滅曲沃武公稱改號晉三十八年秦武二十卒

春王正月

夏宋人齊人衛人伐鄭

宋再先齊報鄭怨也三國伐鄭渴霸也鄭不服則霸不可得而成也

秋荆伐鄭

爭鄭也爭鄭也者間霸也故仍州舉之也夫所取于齊侯之霸者為其尊王也為其能合天下之諸侯以尊王也乃鄭則故即于僭王也者而乃今即于齊也楚故爭之

冬十有二月會齊侯宋公陳侯衛侯鄭伯許男滑伯滕子同盟于幽

同者有同也何同乎同欲也會者九國而盟之欲能有同焉故同言之也孰會之公也不言公諱也曷為諱之叛盟也以叛盟而諱之重失信也其叛盟也若何有後事也夫叛盟則諱之矣則其所盟之同焉者豈不亦善矣乎

邾子克卒

邾故附庸也其日子時王爵之也

甲辰年崩 周僖王五 十有七年 晉武三十九卒 秦德公元年

春齊人執鄭詹

詹以國氏當國也當國則執政也齊何以執之終間霸也齊執之何以稱人罪執也夫以間霸而執之豈不亦執所當執也者其罪之也何居君子謂其服之之道為已微矣

夏齊人殲于遂

遂既亡矣其曰于遂何存之也曷為存之復讎也齊人孰謂謂戍者也蓋齊人滅遂而戍之焉而亡遂之餘能殲齊戍以復讎也然則曷為不使遂得以殲齊則遂既亡矣且若曰齊人滅遂者也而還以自殲焉則夫仁與暴之間其亦孰得而孰失也殲者何盡也自滅之辭也

秋鄭詹自齊逃來

逃者匹夫之行也詹鄭之執政也其以匹夫之辭言之何苟免也謂其亦匹夫而已矣自齊執于齊也自齊逃來則我受之矣夫齊侯始霸天下與之而我為其遁逃主則吾不知其何辭于幽之同盟也穀梁子曰逃義曰逃

冬多麋

麋故我有也何以書多也多則何以書為災也

乙周惠王十年 晉獻公侂諸元年 秦德二卒

春王三月日有食之

不言朔不言日官失也

夏公追戎于濟西

不侵伐而追言無備也夫追者躡其已去也其來也吾不知其去也吾不知則其不為所襲也者幾希是殆于及之矣不言追戎也謂非先王薄伐之義也且不侵伐而言追則又若無名焉

秋有蜚

蜚故非我有也有則為異也且未或不為災也

冬十月

丙周惠王十年 蔡哀二十卒于楚 秦宣元年 楚文十五年卒

春王正月

夏四月

秋公子結媵陳人之婦于鄆遂及齊侯宋公盟

媵淺事也媵陳人之婦則又微乎淺者也而公子往焉盟大事也盟霸主諸侯則又重乎大者也而結專焉則夫人與己之間而輕重之權衡大戾矣夫媵不地者也其地盟地也盟不月略之也略之者惡之也大夫無遂事遂而日及抗之也抗之者罪之也

夫人姜氏如莒

莒非其宗國也夫人姜氏如焉何以乎為名夫人公之母也夫人姜氏如莒何用乎有公

冬齊人宋人陳人伐我西鄙

結方媵陳而盟齊宋矣乃三國伐我何蓋其媵而遂盟也失己與人矣易曰致寇至我之謂矣夫伐不地者也伐而地內故也其曰鄙何遠之也不使寇邇我國也

丁未周惠王二十年蔡穆侯肸元年楚堵敖熊羆元年

春王二月夫人姜氏如莒

再如莒抑又甚矣月謹之于其卒行也

夏齊大災

災者何火也火則其言災何天火之也

秋七月

冬齊人伐我

攘之也霸者之師也

戊申周惠王二十有一年鄭厲二十八年 祀共八年

春王正月

夏五月辛酉鄭伯突卒

秋七月戊戌夫人姜氏薨

夫人薨不地正也正則其不地何其地可必也婦人居于內必之于內寢也夫姜氏先君之賊也乃其薨也以正言之何子不得以仇母也

冬十有二月葬鄭厲公

過時而不日公羊子曰謂之不能葬也

己酉周惠王二十有二年 鄭文公捷元年 祀惠五年 公元年 楚堵敖三弑

春王正月肆大眚

何以書譏也肆眚者何赦過也眚可肆也大眚不可肆也肆大眚則失刑矣

癸丑葬我小君文姜

日葬內也小君非君也其曰君敵體也文諡也文姜先君之賊也葬何以無貶葬之以小君矣惡乎貶

陳人殺其公子御寇

見殺而名可以殺也乃其言殺而不去其公子何專殺也公子之重視大夫也其以人殺之猶無君焉耳

夏五月

無事過時則書首月此其書五月何疑也疑也者宜闕也

秋七月丙申及齊高侯盟于防

高侯齊大夫也孰及之盟公也不言公諱也曷為諱之所盟乎齊者結婚也娶仇人之女則無復有臣子之心也盟大夫之恥猶其後焉者矣日盟謹也

冬公如齊納幣

納幣細事也而親之奚容譏也

庚惠王二十有三年曹莊三十一卒
戊周六年二十有三年楚成王頹元年

春公至自齊

致公惡之也不以納幣致不正其納幣也其他致有同焉

祭叔來聘

祭畿內之諸侯也叔其弟也來聘其君使之也乃不言使畿內之諸侯義不得私聘乎諸侯也

夏公如齊觀社

觀非常也觀社非所以為名也如齊觀社非所以為舉也夫君舉必書以詔後也書而不法後嗣何觀

公至自齊

荆人來聘

荆何以稱人進之也曷為進之來聘也聘中國諸侯之事也故

與其國爲有人也然不言使則猶未與其國爲有君也曷爲未
與其有君僭王也

公及齊侯遇于穀

申防盟且期扈盟也

蕭叔朝公

字蕭君中國之附庸也其曰朝公何非朝所也夫朝必于廟也
朝于公之所嘉禮豈可以野合乎哉然不曰朝于公所非公所
也穀者齊地也然則何以曰王所蓋王者無外

秋丹桓宮楹

桓宮楹桓公之宮之楹也丹丹之也丹之而曰丹非所宜丹也

曷爲丹之將逆齊女也將逆齊女則曷爲丹之誇之也

冬十有一月曹伯射姑卒

十有二月甲寅公會齊侯盟于扈

申締姻好也是我之志也其以齊志之何夫公固桓公之子也
齊襄公則我父之讎也已則不能復讎則亦已矣而又娶其女
其何責耳已乃齊桓公則賢者也獨奈何其不愛人以德也日
盟謹也

辛周惠王二十有四年曹僖公
亥七年赤元年

春王三月刻桓宮桷

曰刻非所宜刻也曷爲刻之將逆齊女也甚誇之也夫齊女也

春秋左傳卷三
者先公之讎之女也已則繼體乎先公而不能復其讎而復娶其讎之女而復丹刻其宮之楹與桷以誇之吾不知其何以慰先公于地下也則公誠無復猶有孝道也是無復猶有人子之心也乃丹楹不月而刻桷月也何丹楹固非禮也若刻桷則更僭矣

葬曹莊公

夏公如齊逆女

親迎正也何以書不正其親迎于齊也于是莊公生三十有七年矣何以愆期若是待女年也夫古者男子二十而冠冠而妻諸侯則十五而冠重宗社也乃鰥以不孝而必待仇人之女之

年而後娶焉則吾誠不知其何心

秋公至自齊

不與夫人偕至非正也始之不正違恤其後

八月丁丑夫人姜氏入

何以不致胡氏曰不可見乎宗廟也入逆辭也以宗廟爲弗受也日入謹入也

戊寅大夫宗婦覲用幣

見夫人公事也其以私言之何夫人不可見乎宗廟則大夫宗婦不得公見乎夫人也幣者何贄也日用不宜用也男贄玉帛也禽鳥也女贄榛栗也棗修也贄用幣非禮也累數大夫宗婦

贄同無別也而淫亂斯兆矣故謹而日也何以謂之私言之也
公事日見私事日覲

大水

冬戎侵曹曹羈出奔陳赤歸于曹

戎侵曹而羈出而赤歸戎能制曹也曹之羈亦猶鄭之忽也曹
之赤亦猶鄭之突也乃突之歸鄭先于忽之出而羈之出曹顧
先于赤之歸者突逐忽也而羈猶未見逐于赤也

郭公

郭公者何疑也疑也者宜闕也或曰公者亡之悞也其或然乎
其或然乎

壬惠王二十有五年
子周八年十一卒

春陳侯使女叔來聘

字陳使命大夫也

夏五月癸丑衛侯朔卒

六月辛未朔日有食之鼓胙牲于社

非常也社非鼓所也牲非社用也故曰用不宜用也然則若何
用幣于社伐鼓于朝

伯姬歸于杞

不逆而歸逆者微也逆者微則名姓不登于史策也而猶書其
歸譏也譏不恥微者之來逆而反成其苟合也

春秋左傳卷三
秋大水鼓用牲于社于門

左氏曰亦非常也凡天災有幣無牲非日月之眚不鼓

冬公子友如陳

報聘也報聘禮也

癸丑周惠王二十有六年 衛懿公赤元年

春公伐戎

夏公至自伐戎

伐戎而致其伐也親之危之也

曹殺其大夫

曰殺不宜殺也專殺也不歸于司寇也不歸于司寇則其書殺

何諸侯之義不得專殺其大夫也其殺之也以國君謀之而執政與也其見殺也不名義不係諸其人也義係諸殺而已其有名者則義兼係諸其人也夫大夫之以事接也書其名氏而已乃其見殺也則舉其官何甚殺也

秋公會宋人齊人伐徐

宋再先齊主是伐也齊猶未成乎霸也齊宋稱人微者將也而公會焉替矣何以不諱公不致也若諱則無以見也其不致何也會伐有齊人則無危道也胡氏以為我故者悞也若由我故也則宜書及而宋不先齊矣而乃今先宋而會以公則是宋故也

冬十有二月癸亥朔日有食之

甲寅周惠王二十年二十有七年

春公會杞伯姬于洮

非事也是踰于禮也

夏六月公會齊侯宋公陳侯鄭伯同盟于幽

再書同盟穀梁子曰于是而後授之諸侯也使齊侯得眾也故

桓之盟不日信之也其會不致安之也

秋公子友如陳葬原仲

原仲者何陳大夫也大夫不葬也其曰葬何公子友之私行也故其葬也不言卒不葬者也夫私行則其無貶何夫如云者

肆之辭也擅行也擅行則無君矣豈日無貶乎

冬杞伯姬來

日來不宜來也胡為乎來哉歸寧也歸寧則其不宜來也何禮父母在歲一歸寧乃春則既會于洮矣

莒慶來逆叔姬

莒慶者何莒大夫也叔姬者何公之女也方逆也何以稱字大夫之自逆也自逆則何以稱字既歸之矣不言歸歸于大夫也則歸之道微也然則何以書公主之也公之女下歸于大夫而公自主之非禮也莒小國無大夫也何以書名接我也

杞伯來朝

春秋不傳 卷三
杞故侯也其日伯時王黜之也

公會齊侯于城濮

乙卯周惠王十一年二十有八年

春王三月甲寅齊人伐衛衛人及齊人戰衛人敗績

伐不日此其日何戰之日也戰之日則曷為加諸伐戰于伐至之日也伐方以是日至而即以至日與之戰則是安戰也故齊伐衛而戰以衛主之曲衛也齊稱人微者將也霸者之師也衛敗矣夫敗未有不言師者此其言人何凡敗之言師者重衆也衛誠有罪也則其衆可勿重而已

夏四月丁未邾子瑱卒

秋荆伐鄭

荆曾書人矣再以州舉之猶夏也

公會齊人宋人救鄭

善之也凡書救未有不善之者也夫救鄭則必敵楚矣奈何以微者將焉曰義足以服之焉耳君子是以善乎齊桓公

冬築鄆

築者何創始也創始則未有不書者也重用民力也

大無麥禾

大無者何竭也夫麥成于夏而禾成于秋其兼言于冬何公不知也公之不知若何是方築鄆矣迨有司會計歲入之數而後

知倉廩之既竭也故曰國以民為天而民以食為天若公固所謂不知天之天也者其何以為國

臧孫辰告糴于齊

何以告糴饑也不言饑渴之也何以先言告糴而後言于齊急之也急之者病之也若曰如齊告糴則其辭緩矣是公使之也不言使不使公為知能告糴也其不使公為知能告糴何也倉廩竭矣而築作不息也

丙辰周惠王二十有九年

春新延廩

言新是有故也何以書穀梁子曰古之君人者必時視民之所

勤民勤于力則功築罕民勤于財則貢賦少民勤于食則百事廢矣大無麥禾告糴于齊而冬築郿春新延廩其用民力為已悉矣噫豈惟用民力為已悉矣

夏鄭人侵許

秋有蜚

書災也蜚故非我有也

冬十有二月紀叔姬卒

紀已亡矣何以卒紀叔姬賢之也賢之則何以不日略之也蓋紀已亡矣

城諸及防

春秋不傳

卷三 莊公

七

春秋不傳 卷三
城月也何以書興二役也興二役則厲民也況往年告糴矣而
秋又有蜚則民寧能枵腹而攻功也凡書土功者月猶未甚也
而此之月則甚也興二役奈何取成于一月之間也

丁巳周惠王三十年秦宣十二年卒

春王正月

夏師次于成

無名焉耳

秋七月齊人降鄆

降國豈無師其稱人何目君也目君則其稱人何罪降也降云
者降之者為主鄆降矣其以齊主之何夫小國恃大國之安靖

已而無乃擗而服之可乎故鄆之罪以齊薄焉耳

八月癸亥葬紀叔姬

不日卒而日葬隱之也

九月庚午朔日有食之鼓用牲于社

冬公及齊侯遇于魯濟

齊侯霸主也何以不言會遇無意也由內以及外也

齊人伐山戎

此齊侯也何以稱人貶也曷為貶勤遠略也且其服之為已微
矣何以知其齊侯也于其獻捷也目之故知之也

戊午周惠王三十年秦成公元年

春築臺于郎

厲民也臺者游觀之所也奈何其厲民而以自樂也而況非築時也

夏四月薛伯卒

薛故侯也其曰伯時王黜之也

築臺于薛

一歲再築抑又甚矣

六月齊侯來獻戎捷

齊之捷何以來獻威我也威我則何以書來獻抑之也何以抑之其服人之道非所以為服也自下奉上曰獻軍獲曰捷

秋築臺于秦

三時築臺則終歲厲民也抑又愈甚矣

冬不雨

己未周惠王十三年三十有二年曹僖卒

春城小穀

公自築郿以來未五年也而用民力者八焉何其僭也

夏宋公齊侯遇于梁邱

宋公何以先齊侯凡盟會之先以霸主也主盟會也然而秦王章矣若遇則無意之會也故子猶得以先王之制之爵及之也

秋七月癸巳公子牙卒

八月癸亥公薨于路寢

君薨必地謹其卒也路寢者何大寢也薨于路寢正也其爲正若何就公卿也且禮男子不絕于婦人之手

冬十月己未子般卒

子般者誰君也君則何以稱子而不言薨未踰年也未踰年則未成乎君也何以名未葬乎先公也未葬乎先公則未終子道也此蓋弑也何以知其弑閔公不言卽位也弑則何以謂之卒諱也不幾逸賊已乎曰彰之矣賊子者誰慶父也何以知其慶父有後事也

公子慶父如齊

出奔也何以言如甚之也其甚之若何國未有能討之者也如者自肆之辭也故知賊子般者慶父也夫賊君者人所宜致討也慶父亦一人耳何以舉國之人未有能討之者蓋慶父之得兵權自伐於餘邱以來餘三十年矣故不去其公子以累莊公也何以知其出奔國無君而曰如齊則固非使也

狄伐邢

春秋不傳卷三終

五世姪孫 顓校棊

春秋字音

莊公

元年 孫 音遜

單 音善 後同

邾 音蒲 丁反

郟 音子 斯反

郟 音吾 反

二年 禚 音諸 若反

馮 音皮 冰反

三年 溺 音奴 歷反

鄆 音戶 圭反

五年 郟 音倪

六年 俘 音孚

七年 恒 音胡 登反

見 音現

隕 音于 閔反

雨 音見 隱九年

八年 治 音平 聲反

降 音戶 江反 後同

還 音旋

九年 莒 音其 器反

乾 音干

浚 音俊

洙 音殊

十年 勻反上酌 乘反繩證 莘反所巾 譚音潭

十有二年 捷反疾葉 仇音求

十有四年 郵反玄遍

十有七年 殲反子廉 麋音眉

十有八年 濟後子禮反 蝥音域

十有九年 媵又盈去聲

二十有二年 肯反所景 御反魚呂 僉音奚

二十有三年 楹音盈 射九年見桓 扈音戶

二十有四年 桷音覺 覲音狄 羈反居宜

二十有五年 女音汝

二十有七年 洮徒刀反

二十有八年 瑣素果反 郿反芒悲

二十有九年 廕音救 蜚反扶味

三十年 鄣音章

三十有二年 寢反七稔 般後音班 邗音彤

